

Special Olympics Aruba y Digicel ta invita comunidad pa bin apoya nos atletanan special

Special Olympics National Games ta "on"



ORANJESTAD (AAN): Pa di 13 aña consecutivo Special Olympics Aruba ta organiza su National Games anual pa tur atleta cu un limitacion na Aruba. Entrenamento pa e Weganan Nacional, cu bista riba adkiri experiencia di parti di e atletanan y pa prepara pa World Games ta tuma luga henter aña. Nos atletanan ta bon prepara y cla pa demostra nan talento y trabao duro diabierna, diasabra y diadomingo awo. Digicel y Special Olympics

Aruba ta invita henter nos comunidad, famia y amigonan di e atletanan pa acudi na e weganan y apoya nos atletanan special.

Di parti di e empleadonan di Digicel - como un partner fiel y gran apoyo di Special Olympics Aruba, Elaine Singh a gradici tur persona y compania cu a contribui na e prome accion pa recauda fondo pa Special Olympics Aruba por bay World Games. E fundraiser aki a tuma luga dos siman pasa y cu

entusiasmo Singh a comparti cu ainda tin donacion y checknan drentando. Ainda falta mas di un aña pa e World Games, pero ta importante pa cuminsa recauda fondo tempran pa por yega e meta aki.

E National Games ta un exigencia di World Games y aki tambe lo cuminsa scoge e atletanan kende lo worde invita pa entrena pa World Games y representa nos pais cu hopi orguyo internacionalmente. Tradicionalmente e team di Aruba ta hopi bon prepara y semper ta bolbe Aruba cu hopi medaya.

Dirigientenan di Special Olympics ta invita comunidad di Aruba pa presencia e apertura colorido di e National Games, tumando luga diabierna atardi for di 6or na Stadion Guillermo Prospero Trinidad, pa e tradicional Torch Run, desfile y show di apertura cu e brassband di San Francisco y grupo di baile di Chastity Hodge. Inmediatamente despues di e apertura e prome competencianan di atletiek ta tuma luga.

Durante un conferencia di prensa e fundado y presidente di Special Olympics Aruba, Tuyo Werleman a splica cu lo tin mas di 100 atleta, kende ta miembro di SVGA y alumnonan di e schoolnan Caiquetio, Emma y Paso pa Futuro, como tambe tin algun atleta cu ta trahando, pero a keda activo den Special Olympics.

E deportista y comentarista di deporte hopi conoci na



Aruba, Karel "Cai Cai" Williams ta formando parti di Special Olympics pa algun tempo caba. El a resumi e deportenan cu ta inclui den e National Games, esta futbol, badminton, bowling, bolas criollas (bocce), landamento y atletiek.

Williams a bisa cu na momento cu na e World Games tin representacion di mas di 160 pais. E National Games ta worde considera masha halto den puntuacion pa evalua nos atletanan pa por forma e delegacion pa bay World Games. El a bisa cu tur pais ta haya e oportunidad pa participa y World Games ta avisa cada pais cuanto cupo den cua deporte ta disponibel pa nan atletanan.

Williams ta añadi cu Special Olympics ta desea di amplia e deportenan ofreci na e atletanan, pero tin falta di dirigientenan pa guia e atletanan. Por ehempel si

nan momento cu e trainer di ping pong mester a tuma un descanso tabatin un otro trainer, no a stop cu entrenamento y por a ofrece e deporte aki tambe na e National Games. Asina tin mas caso y Special Olympics ta pidi cooperacion di dirigientenan pa por expande e cantidad di deportenan ofreci.

El a gradici tur trainer y e bondnan - Aruba Athletiek Bond y Arubaanse Voetbal Bond - pa nan cooperacion cu e atletanan y cu e Weganan Nacional.

"Laga mi gana y si mi no por gana, laga mi ta balente den mi intento," Tuyo Werleman comparti e lema aki di Special Olympics y a conclui pidiendo publico general pa acudi na e weganan y demostra aprecio di nos comunidad pa e esfuersonan y balentia di nos atletanan special.





YOUNG FELLOW
BAR & RESTAURANT

Barcadera 10 - Tel: 585-6408

Nos ta situa na Barcadera net otro banda di Veld Duracell

Special di awe: Galiña Stoba - Afl. 8,50

Diabierna **HAPPY HOUR** 5:00PM - 7:00PM
Tur cerbes na Afl. 3.00

y for di 9:00 pm - 1:00 am

Baila Dushi cu ADU